



LE GOUVERNEMENT  
DU GRAND-DUCHÉ DE LUXEMBOURG  
Ministère des Affaires étrangères  
et européennes

Direction de la Défense

**Äntwert vum Verdeedegungsminister a vun der Gesondheetsministesch op d'parlamentaresch Fro n° 7643 vum 22. Februar 2023 vun den honorabelen Deputéierten Diane Aehm a Jean-Marie Halsdorf**

An hire Froe bezéien sech déi honorabel Deputéiert op en Artikel, deen den 21. Februar 2023 op wort.lu publizéiert gouf. Deen Artikel enthält eng Rei Feeler a falsch Behauptungen. De Verdeedegungsminister huet direkt no der Publikatioun dorop reagéiert an eng Stellungnam gemaach. Dës gouf den 22. Februar op wort.lu verëffentlecht.

Contrairement zu de Behauptunge vum Artikel gouf keen Dokter agestallt – et handelt sech also net em e Rekrutement.

D'Armée verfüügt aktuell iwwert 1 Officier-médecin am Fonctionnairesstatut an 1 Dokter, deen als Employé agestallt ass. Fir d'Aarbecht déi ufält ze bewältegen, gräift d'Armée och op extern Déngschtleschter (prestataires de services) zeréck.

Am Hierscht 2022 huet d'Armée eng Ausschreiwung fir e „médecin généraliste – prestataire de service“ op jobs.lu a monster.lu verëffentlecht. Dës Sitten sinn net mat govjobs.lu, dem Rekrutementsportal vum ëffentlechen Déngscht ze verwiesselen.

Doropshi krut d'Armée 7 Kandidaturen. 2 Kandidature goufe verworf wéinst feelender *Autorisation d'exercer* an 1 Kandidatur gouf zeréckgezunn. Déi 4 reschtlech Kandidature goufen evaluéiert an den Dokter Diagne gouf zeréckbehalen. Säin Dossier huet all déi gefroten Informatiounen, notamment d'*Autorisation d'exercer* a säin Diplom, enthal. Contrairement zu der Duerstellung am éischten Artikel op wort.lu, war also keng Geneemegungsprozedur vum Collège médical um Lafen, weder während dem Dr. Diagne senger Kandidatur, nach während senger Déngschtleschtung fir d'Armée. Zu deem Zäitpunkt louch dem Ministère de la Santé näischt géint den Dr. Diagne vir. De positiven Avis vum Collège médical louch scho Jore virun der Kandidatur vir a seng *Autorisation d'exercer* ass op 2019 datéiert.

Den 22. November huet den Dokter Diagne en Déngschtleschtungskontrakt (Contrat de prestation de service) mat der Armée ënnerschriwwen. En Aarbechtsverhältnis mam Staat (Fonctionnaire, Employé oder Salarié) stoung zu kengem Moment zur Debatt.

Während bei Rekrutementer (Fonctionnaire, Employé oder Salarié) d'Consultatioun vum Casier gesetzlech virgeschriwwen ass, ass dat fir extern Déngschtleschtungskontrakter vum Staat net de Fall. Säit deem Joer freet d'Armée elo och bei all *personne physique* déi fir en Déngschtleschtungskontrakt kandidéiert de Casier.

Am Kader vu sengem Déngschtleschtungskontrakt huet den Dokter den 1. an de 6. Dezember während jeeweils 8 Stonne Consultatiounen um Härebierg a Präsenz vun engem Infirmier vun der Armée ginn.

Den 8. Dezember 2023 war den Dokter op der Plaz, wéi d'Armée gewuer ginn ass, dass den Dr. Diagne am Mee 2022 vum Lécker Geriicht zu enger *peine de probation autonome* vun 2 Joer verurteilt gouf an dass aktuell nach e Prozess wéinst Ausstelle vu gefälschte COVID-Certificate géint hie leeft. Den Dokter krut

direkt dee selwechten Dag matgedeelt dass d'Arméi mat *effet immédiat* net méi op seng Servicer géif zrëckgräifen. E krut den Accès op de Centre militaire gespaart a gouf erausbegleet.

Den Dokter huet den 13. Dezember en Extrait vu sengem belsche Casier eragereecht op deem déi genannte Verurteilung net ernimmt gëtt. Dëst schéngt op dem Artikel 595 vum belschen *Code d'instruction criminelle* ze berouen dee virgesäit dass gewëss Verurteilungen net am Casier stinn. Deemo wier d'Consultatioun vum belsche Casier éier de Kontrakt ënnerschriwwen gouf net opschlossräich gewiescht.

No suergfältiger juristescher Iwwerprüfung gouf de Kontrakt den 10. Januar 2023 gekënnegt.

Déi medezinesch Zertifikater, déi den Dokter Diagne während deenen dräi Deeg um Härebiere ausgestallt huet, goufen nodréiglech iwwerpréift an et konnte keng Irregularitéite festgestallt ginn.

Lëtzebuerg, den 17. Mäerz 2023

(s.) François Bausch  
Verdeedegungsminister